



**JUDICIAL SYSTEM MONITORING PROGRAMME**  
**PROGRAMA DE MONITORIZAÇÃO DO SISTEMA JUDICIAL**

***Komunikadu Imprensa***

Períodu : Abril 2012

Edisaun : Maiu 2012

**Ministériu Públiku akuza prátika korupsaun:  
Parlamentu Nasionál oficialmente hasai Ministru Estatal nia imunidade**

Parlamentu Nasionál ofisiálmente hasai imunidade husi Ministru Administrasaun Estatal no Ordenamentu Territóriu (MAEOT) Arcângelo de Jesus Gouveia Leite iha loron 23 Marsu ho votus afavór 42, kontra 1 no absteinsaun 1.

Parlamentu foti desizaun ne'e, depois-de simu pedidu husi Tribunál Distrital Baucau ne'ebé husu suspensaun funsaun ba Ministru Arcângelo Gouveia Leite hodi tuir prosesu julgamentu Tribunál Distrital Baucau. Kazu ne'e rejista iha Tribunál Distrital Baucau ho Númeru Prosesu 141/CRM/2010.TD.BCU ne'ebé akuza ho materia prátika aktu korupsaun ho karakteristiku administrasaun danoza no abuzu poder iha prosesu tenderizasaun ba projetu Programa Dezenvolvimentu Lokal (PDL) iha distritu Baucau.

Diretór JSMP Luis de Oliveira Sampaio haktuir katak *JSMP apresia teb-tebes vontade Parlamentu Nasionál hodi continua asegura prosesu justisa ba ema hotu no hola medida nesesariu tuir lei no suspende autóridade estadu sira ne'ebé deskonfia prátika korupsaun hodi ba hatan iha tribunál.*

Ministériu Públiku iha sira nia akuzasaun ne'ebé relata hamutuk ho dexasu Tribunál Baucau akuza atual Ministru Estatal arguidu Arcângelo Leite hamutuk ho arguidu seluk Bernardo Ornai hanesan Prezidénte Komisaun ba Planeamentu no Implementasaun (KPI) iha Administrasaun Distritu Baucau nu'udár kó-autór ne'ebé komete krime korupsaun ho karakteristiku administrasaun danoza ne'ebé previstu iha artigu 274 (1) no (2) konjuga ho artigu 30 (2) Kódigu

Penál. Iha akuzasaun Minteriu Públiku nian mos rekere indemnizasaun sivíl ho valór \$7.882.79 (rihun hitu atus ualu resin ualu virgula hitu nulu resin sia).

Materia akuzasaun hirak ne'e bazeia rezultadu investigasaun husi Ministériu Públiku ba prosesu avaliasaun tenderizasaun projetu Programa Dezenvolvimentu Lokal (PDL) iha Distritu Baucau, ne'ebé partisipa husi kompañia rua, mak hanesan Kompañia UNIPESSOAL LDA ho kompañia LAMEGUA STAR LDA. Kazu ne'e hahú bainhira Komisaun Konkursu Lokal (KKL) Distritu Baucau nomeia kompañia UNIVEN UNIPESSOAL LDA nu'udár vensedor primeíru ho razaun kompañia apresenta presu ne'ebé ki'ik ho valór U\$88,544.82 ka 10% menus liu husi orsamentu estadu ne'ebé aloka ba projetu ne'e ho valor U\$89,854.83.

Maibé, bainhira iha prosesu atu haruka naran vensedor ba Diretór Nasional Administrasaun no Finansas MAEOT, arguidu Bernardo Ornai uza nia podér amesa membru KKL hodi ejize tau de'it Kompañia LAMEGUA STAR LDA mak hanesan vensedor ne'ebé ho valor osan U\$97,737.62 ka 10% aas liu orsamentu estadu ne'ebé aloka ba projetu ne'e.

Maibé iha ikus, ekipa teknika DNDLOT nu'udar ekipa tekniku iha Ministériu Estatal nia okos, identifika katak iha failansu balun ne'ebé assembleia KKL halo no presiza hadia tanbá tuir lolo'os kompañia UNIVEN UNIPESSOAL LDA mak sai nu'udar vensedor. Ho nune'e DNDLOT haruka fali karta ida ba Diretór Administrasaun no Finansas MAEOT katak kompañia UNIVEN UNIPESSOAL LDA maka sai nu'udár vensedor primeíru maibé nia direitu ignoradu.

Ministru MAEOT ne'ebé antes ne'e lahetan karta CC husi DNDLOT derepente hatun karta dexpasu ida ba Diretór Administrasaun no Finansas MAEOT nian hodi husu labele anula desizaun husi KKL tanbá ida ne'e nu'udár projetu pilotu ne'ebé tenki kumpri. Ho nune'e, iha fulan Jullu 2009, desizaun tun husi gabeti MAEOT dehan katak projetu ne'e intrega ba Kompañia LAMEGUA STAR LDA.

Relasiona faktu hirak ne'e, Ministériu Públiku konsidera, Ministru Arcângelo Leite viola regra kontratu no jestaun aprovizionamentu nian, no halo abuzu podér tanbá hamosu danu patrimoniál ekonómika ne'ebé bo'ot ba estadu. Tuir orariu antes, Tribunál ajenda ona julgamentu ba Ministru Arcângelo Leite iha lora 5 no 6 fulan Abril, maibé la konsege realiza tanbá Parlamentu seidauk konsege aprova iha votasaun antes iha lora 2 fulan Abril 2012.

Atu hetan informasaun kle'an favor kontaktu:  
Luis de Oliveira Sampaio  
Diretór Ezekutivu JSMP  
Diresaun e-mail: [luis@jsmp.minihub.org](mailto:luis@jsmp.minihub.org)  
Landline: 3323883/7295795